

Morning Regional Dogri News Bulletin, 13th June 2024

मार्निंग डोगरी न्यूज़ बुलेटिन, समें. 09-20 Hrs



Headlines

- प्रधानमंत्री नरेन्द्र मोदी होर जी-7 शिखर सम्मेलन च हिस्सा लैने लेई अज्ज ईटली लेई रवाना होआ करदे न।
- जम्मू प्रांतै च पिछले 96 घंटे च 5 आतंकी वारदातां, सुरक्षा बंदोबस्त निगगर कीते गे न।
- उपराज्यपाल मनोज सिन्हा होरें आखेआ ऐ जे जिच्चर जम्मू कश्मीर च आतंकवाद दा पूरी चाल्ली खात्मा नेई होई जंदा ओ अराम करियै नेई बौंहगन।
- केन्द्री मंत्री डॉ. जितेन्द्र सिंह होरें आखेआ ऐ जे आतंकवादिण दी जम्मू प्रांतै आतंकवाद गी बढ़ावा देने दी साजश गी कामयाब नेई होन दित्ता जाग।
- उपराज्यपाल मनोज सिन्हा होरें आखेआ ऐ जे धान दी काशत जम्मू कश्मीर दी अर्थबवस्था दी रीढ़ ऐ।



PM-G-7

प्रधानमंत्री नरेन्द्र मोदी होर कल जी-7 शिखर सम्मेलन च हिस्सा लैने लेई ईटली दे अपूलिया लेई अज्ज रवाना होआ करदे न। विदेश सचिव विनय कवात्रा होरें नमीं दिल्ली च समाचार माध्यमें गी जानकारी दिंदे होई आखेआ जे शुक्रवारें होने आले सम्मेलन लेई भारत गी इक आउटरीच मुल्खै दे तौर पर साद्दा दित्ता गेआ ऐ। लगातार त्री बारी औहदा संभालने मगरा प्रधानमंत्री हुंदी एह विदेश दी पैहली यात्रा ऐ। उनें आखेआ जे एह दौरा जी-7 शिखर सम्मेलन च मजूद दुनिया दे लीडरें कन्नै गल्लबात दा मौका थहोग।



PM-Kuwait

प्रधानमंत्री नरेन्द्र मोदी होरें नमीं दिल्ली च अपनी रिहायश थाहर कुवैत च अगग लगने आली दुखदाई घटना बारे इक जायजा बैठक दी अध्यक्षता कीती।

प्रधानमंत्री होरें इस हादसे पर दुख जाहर कीता ते मरने आलें दे परोआर आलें कन्नै संवेदना प्रकट कीती। उनें घायलें दे तौले बल होने दी कामना बी कीती। प्रधानमंत्री होरें पीड़ितें गी सब्बै मुमकिन सहायता उपलब्ध कराने दे निर्देश दित्ते। उनें विदेश राज्यमंत्री कीर्ति वर्धन सिंह होरें गी तुरत कुवैत जाने दे निर्देश दित्ते ते राहत उपाएं ते मृतक लोकें दे अवशेषें गी वापस मुख्य आनने दा कम्म करने लेई आखेआ। विदेश मंत्रालय नै आखेआ ऐ जे कुवैत दे मागफ च मजूरें दी रिहायश आली थाहर अगग लगने आली घटना च तकरीबन 40एं भारतीयें दी मौत होई गई ऐ ते 50 जनें घायल होई गे न।



Security Jammu

पिछले 96एं घैंटे थमां 5 टाकरे ते हमले जम्मू खित्ते च होए न, जिस च दऊं आतंकवादी मारे गे न। इक सीआरपीएफ जुआन शहीद ते 4 शैहरी बी कटुआ ते रियासी जिले च अपनी जान मुआई चुके दे न, जिसलै के केई होरने जख्मी होई गे न। इलाके च 7 सुरक्षा बल कर्मी जिंदे च 5 जुआन, इक विशेष पुलस अफसर, इक पुलस कर्मी ते 42 शैहरी जख्मी होए न। सुरक्षा बलें हीरानगर च भखे दे टाकरे च दऊं आतंकवादिएं जेहड़े जे भारी असले कन्नै लैस हे, गी मारी मकाया ऐ ते इक सीआरपीएफ कर्मी शहीद होई गेआ ऐ। जम्मू सांबा कटुआ रेंज दे पुलस दे उपमहानिदेशक ते कटुआ दे एसएसपी हुंदा कटुआ दे हीरानगर इलाके च किश घैंटे तगर चले दे टाकरे च मसा बचाह होआ। जम्मू जोन दे अतिरिक्त पुलस महानिदेशक आनंद जैन होरें जानकारी दित्ती जे दऊं आतंकवादिएं जिनें हाल च गै घुसपैठ कीती ही। जिला कटुआ दे हीरानगर दे सायदा सुकल ग्रां च इक घर च जाई बड़े ते पानी पलाने आस्तै आखेआ। उनें आखेआ जे जानकारी थ्होंदे गै एसएचओ ते एसडीवीओ दी टीम मौके पर पुज्जी गे। इक आतंकवादी गी कल संजा भखे दे टाकरे च मारी मकाया गेआ, जिसलै के दुए आतंकवादी गी कल मारी मकाया गेआ।



LG Security

जम्मू कश्मीर दे उपराज्यपाल मनोज सिन्हा होरें कल आखेआ जे केन्द्र शासत प्रदेश दे लोकें गी शांत रौहना लोड़चदा की जे प्रशासन ते सुरक्षाबल उच्चिर अराम कन्नै नेई बाँहगन जिच्चिर आतंकवाद ते उंदे हिमायती जम्मू कश्मीर दी धरतै पर खत्म नेई कीते जांगन।

टैगोर हाल च जम्मू कश्मीर कला संस्कृति ते भाषाएं आस्सेआ आयोजित लोक उत्सव च संबोधत करदे होई उपराज्यपाल होरें आखेआ जे रियासी हमले च 9 जनें दे मरने परैत समाज च गमो-गुस्सा ऐ। उनें आखेआ जे लोकें च गुस्सा जाईज बी ऐ ते लोकें गी पुलस ते सुरक्षाबलें दी वीरता, साहस उप्पर भरोसा होना लोडचदा।



Union Minister

केन्द्रीय मंत्री डॉ. जितेन्द्र सिंह होरें आखेआ जे कश्मीर घाटी च सुरक्षाबलें दे दबाह करी हताश होइयै आतंकवादी नस्सा'रदे न ते जम्मू खित्ते च अपनिएं गतिविधियेंद । ध्यान जम्मू उप्पर केन्द्रित करने दा प्रयास करा'रदे न। मगरा उंदी एह कोशश नाकाम होग। डॉ. सिंह होरें एह गल्ल कडुआ च होए दे टाकरे च जख्मी नागरिक ओम प्रकाश हुंदी डोल पुच्छने लेई कटुआ अस्पताल पुज्जने परैत आख्खी। मीडिया कन्नै गल्ल करदे होई डॉ. सिंह होरें आखेआ जे आतंकवाद दे प्रायोजकें गी पता लग्गी गोआ ऐ जे उनेंगी कदें बी इस खित्ते च साथ नेई थ्होग। उनें आखेआ जे हीरानगर क्षेत्र सनें समूलचे खित्ते च राष्ट्रवादी ते देश भक्त लोक रौंहदे न। इस गल्ल पर मकामी लोकें आखेआ शक्क-शूबे आली नकलो हरकत दा पता सुरक्षाबलें गी देने ते सुरक्षाबलें कन्नै छप्पे दे आतंकवादिएं गी फगड़ने च मदद करने कन्नै साफ पता लगदा ऐ। उनें आखेआ जे सरकार ग्र्राएं सरबंधी किट्टें गी मजबूत ते मता असरदार बनाने दी प्रक्रिया च लगी दी ऐ।



LG-Paddy

उपराज्यपाल मनोज सिन्हा होरें आखेआ ऐ जे जम्मू कश्मीर दे इक बड्डे इलाके च मुंजी यानि धान दी काशत कीती जंदी ऐ जे एह इत्थुं दी अर्थबवस्था दी रीढ़ ऐ। कल अनंतनाग जिले दी बीजबिहाड़ा च "मुंजी दी लैब लाने" दे सिलसिले च आयोजित इक उत्सव च शिरकत करदे होई उपराज्यपाल होरें आखेआ जे प्रधानमंत्री हुंदे मार्गदर्शन हेठ जम्मू कश्मीर सने समूलचे मुल्खै च करसानें दी भलाई बेहतरी ते उंदे सशक्तिकरण लेई राई-बाई ते एहदे कन्ने जुड़े दे होरने क्षेत्रें दे विकास ते उंदे च नमें सिरैया जान भरने बक्खी चेचा ध्यान दित्ता जा'रदा ऐ। राई-बाई ते पूरे पराते विकास सरबंधी एचएडीपी कार्यक्रम दा जिक्र करदे होई उपराज्यपाल होरें आखेआ जे एहदे नै सब्बने क्षेत्रें गी बढ़ावा थ्होआ करदा ऐ।



LG-SASB

उपराज्यपाल मनोज सिन्हा होरें कल श्रीनगर दे पैथा चौक स्थित श्री अमरनाथ जी श्राईन बोर्ड दे यात्री निवास ते दफतर दे जारी निर्माण कम्में दा मौके पर जाइयै जायजा लैता। इस दरान उनें इस प्रोजेक्ट गी समें सिर मुकम्मल करने लेई कम्मै दी रफतार च तेजी आनने दा निर्देश जारी कीता तां जे श्रद्धालुएं लेई सुविधा गी जकीनी बनाया जाई सकै।



CS-Broad Band

मुख्य सचिव अटल डुल्लू होरें जम्मू कश्मीर दे हर इक ग्रामीण ते दूर दरेड़े इलाके तोड़ी ब्रॉड बैंड दी वाजब सुविधा ते पुज्ज जकीनी बनाने दी प्रक्रिया दा जायजा लैने लेई इस मकसद लेई खडेरी गेदी प्रदेश ब्रॉड बैंड कमेटी दी अध्यक्षता कीती। अजें तोड़ी कीते जाई चुके दे कम्में दा जायजा लैदे होई मुख्य सचिव होरें कम्में दे हर हिस्से ते हर गेड़ लेई समें सीमा तैह करने लेई आखेआ। इस सुविधा कन्नै जम्मू कश्मीर दे हर इक दूर दरेड़े इलाके च 4^{जी} नेटवर्क उपलब्ध होग। उनें ग्रामीण विकास मैहकमे ते बीएसएनएल गी ओएफसी लाने लेई पंचैतें दी रजामंदी बारे किट्ठे सर्वे करने लेई बी आखेआ ते दौनें बशकार होए दे समझौते तैहत इक दुए गी सैहयोग देने पर बी जोर दित्ता।



Local Eid Festival

औंदी ईद दी पछोकड़े च बजारें च हर चीज दी दस्तेयाबी जकीनी बनाने ते कोई दुकानदार चीजां मैहगियां जां मलावटी नेई बेचै इस गी जकीली बनाने लेई प्रशासन आस्सेआ गूल ते संगलदान दे बजारें च जांच चैकिंग कीती गेई। दकानदारें गी खबरदार कीता गेआ जे कोई बी जेहड़ा मैहगा मलावटी घटिया जां नकली समेयान बेचग, ओहूदे खलाफ सख्त कारवाई कीती जाग।



IMD

भारतीय मौसम विभाग नै जम्मू कश्मीर दे जम्मू संभाग, उत्तराखंड, पंजाब, हरियाणा, चंडीगढ़, दिल्ली, मध्यप्रदेश, राजस्थान, हिमाचल प्रदेश ते ओडिशा च अगले त्रै-चार दिनें तोड़ी गर्मी दी लैहर बरकरार रौहने दी पेशगोई कीती ऐ।

मैहकमे दा आखना ऐ जे दक्खन-पच्छमी मानसून दे होर अगड़े बघने कन्नै अगले 2-3 दिनें तगर ओडिशा दे किश हिस्सें, आंध्रप्रदेश दे समुंद्रै कन्नै लगदे इलाके ते उत्तर पच्छमी बंगाल दी खाड़ी दे इलाके च गर्मी थमां राहत थोई सकदी ऐ। तोआई पच्छम बंगाल दे उप-हिमालयाई इलाके, सिक्किम ते पूर्वोत्तर भारत च अगले 4-5 दिनें दरान भारी बरखा दी पेशगोई कीती गई ऐ। जम्मू च कल बद्धोबद्ध तापमान 43.6 डिग्री सैल्सियस रिकार्ड कीता गेआ।



ICC World Cup

मर्दे दे आईसीसी टी-20 विश्व कप क्रिकेट दे कल रातीं न्यूयार्क दे नस्साउ काउंटी अंतर्राष्ट्रीय स्टेडियम च खेड्डे गेदे इक मैच च भारत नै अमरीका गी 7एं विकेटें कन्नै हराई दित्ता। इस जित्त दे कन्नै गै भारत सुपर-8 च अपनी थाहर पक्की करी लैती ऐ। अज्ज इक चैंपियनशिप दे दऊं मैच खेड्डे जांगन। पेळ्ले मैच च एल्ले वेस्टइंडीज दा मकाबला त्रिनिदाद दे ब्रायन लारा स्टेडियम च न्यूजीलैंड कन्नै जारी ऐ, जिसलै जे दुआ मकाबला संजा किंगसटाउन च बंगलादेश ते नीदरलैंड बश्कार होग। एल्लै चला'रदे मैच च पैहूले बल्लेबाजी करदे होई वेस्टइंडीज नै 20एं ओवरें च 149 रंज बनाए जेह्दे परते च न्यूजीलैंड नै जित्त लेई लोड्चदे 150 रंजें दे लक्ष्य दा पिच्छा करदे होइ खबरा लिखे जाने तगर 17 ओवरें च 6 विकेटें दे नुकसान पर 100 रंज बनाई लैते दे हे।

